



Na osnovu člana 17. stav 1. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24 i 27/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, sudija Halil Lagumdžija, predsjednik Vijeća, sudija Aleksandra Obradović i sudija Sanela Gorušanović - Butigan, potpredsjednice Vijeća, te mr. Lejla Hadžić, tužilac Biljana Simeunović, tužilac Saša Sarajlić, tužilac Željka Fabić, advokatica mr. Duška Bogojević, sudija Ljiljana Bošnjak - Glizijan, advokat dr. sc Davor Martinović, sudija mr. Srđan Forca, sudija Mustafa Šabić i advokatica Amila Kunosić, na sjednici održanoj 25. i 26.09.2024. godine, donijelo je

R J E Š E N J E **o imenovanju sudije Općinskog suda u Tuzli**

- I. Za sudiju Općinskog suda u Tuzli imenuje se **Selimović Halilčević Alvira**.
- II. Datum stupanja na dužnost imenovane Vijeće će odrediti posebnom odlukom.

O b r a z l o ž e n j e

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 15.01.2024. godine objavilo javni konkurs pod brojem: 04-07-3-188-1/2024, kojim je oglašeno 10 (deset) pozicija sudije Općinskog suda u Tuzli.

Nakon provedene konkursne procedure, nadležno podvijeće je u skladu sa članom 59b. st. (1), (3) i (4), a u vezi sa članom 60. Poslovnika VSTV-a BiH izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovníkom VSTV-a BiH, Vijeće je odlučilo da na poziciju sudije Općinskog suda u Tuzli imenuje šest kandidata, i to kandidate na rang listi pod rednim br. 1, 2, 4, 6, 15 i 19, Selimović Halilčević Alviru, Omerović Selmu, Sinanović Emira, Jakšić Slađanu, Livadić Tamaru i Matuzović Maju, dok je za četiri oglašene pozicije odlučeno da se konkurs ponovi, iz razloga jer Vijeće nije bilo u mogućnosti primijeniti odgovarajuće ustavne odredbe kojim se uređuju jednaka prava i zastupljenost konstitutivnih naroda i ostalih u smislu člana 43. stav 2. Zakona o VSTV-u BiH.

Dakle, Vijeće je odlučilo da za jednu od deset oglašanih pozicija sudije Općinskog suda u Tuzli imenuje kandidatkinju na rang listi pod rednim brojem 1 Selimović Halilčević Alviru iz reda bošnjačkog naroda, koja trenutno obavlja dužnost dodatnog sudije u Općinskom sudu u Tuzli, od 01.11.2020. godine. Prethodno imenovanju na dužnost dodatnog sudije, imenovana kandidatkinja je u periodu od 01.09.2011. g. do 31.10.2020. godine obavljala poslove stručnog saradnika/savjetnika u Gradskoj upravi Grada Živinice, u periodu od 01.11.2010. g. do 01.06.2011. g. poslove pravnika u privrednom društvu „HIH“ d.o.o. Živinice, u periodu 29.03.2010. g. do 31.08.2010. godine poslove sekretara u JU Osnovna škola Višća, u periodu od 01.02.2010. g. do 31.10.2010. g. u Odjeljenju za zemljišnoknjižne poslove Općinskog suda u Živinicama obavljala je poslove kontrolora tačno unesenih zemljišnoknjižnih uložaka u

elektronsku zemljišnu knjigu, te u periodu od 2007. g. do 2008. g. poslove pripravnika u Općinskom sudu u Živinicama.

Vijeće je nakon ocjene stručne sposobnosti kandidatkinje zasnovane na dosadašnjim rezultatima u karijeri, sposobnosti pravne analize, komunikativnosti i sposobnosti prezentacije, sposobnosti kandidatkinje da odgovorno, nezavisno i nepristrasno obavlja funkciju sudije, uzimajući u obzir, između ostalog, dosadašnje radno iskustvo kandidatkinje, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci i ocjene kriterija podobnosti, ocijenilo da imenovana kandidatkinja u potpunosti ispunjava uslove za imenovanje propisane u članu 43. Zakona o VSTV-u BiH.

Kada je u pitanju broj ostvarenih bodova, Vijeće je imalo u vidu da je imenovana kandidatkinja u toku konkursne procedure, u pogledu bodova za kriterij stručnosti i sposobnosti pravne analize ostvarila ukupno 100 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvarila ukupno 19 bodova od mogućih 20 bodova, što ju je u konačnici rangiralo na prvom mjestu rang liste kandidata sa ukupno ostvarenih 119 bodova od mogućih 120 bodova.

Kriteriji stručnosti i sposobnosti pravne analize imenovane kandidatkinje, koja već obavlja dužnost dodatnog sudije, utvrđeni su na osnovu ocjene rada za posljednje tri godine za koje je ocijenjena, i to za 2021. g., 2022. g. i 2023. g., a računajući do dana isteka roka za podnošenje prijave po navedenom konkursu.

Na osnovu ocjena rada za 2021. g., 2022. g. i 2023. g., odnosno ocjena 5, 5 i 5, utvrđeno je da je kandidatkinja za navedene tri godine za koje je ocijenjena ostvarila prosjek od 5. Prema odredbama člana 56. stav 2. Poslovnika VSTV-a BiH, njenoj prosječnoj ocjeni rada za prethodne tri godine koja iznosi 5 dodijeljen je ekvivalentan broj bodova koji se koristi u konkursnoj proceduri od 100 bodova.

Ostali kriteriji, koji se odnose na sposobnost kandidatkinje da odgovorno, nezavisno i nepristrasno obavlja funkciju za koju se prijavila, profesionalne nepristrasnosti i ugleda, te ponašanja van posla, dosadašnjeg radnog iskustva kandidatkinje, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54a., 54d., 54e. i 54f. Poslovnika VSTV-a BiH, pri čemu je kandidatkinja po tom osnovu u konačnici ostvarila ukupno 19 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidatkinja u skladu sa čl. 59a. stav (1) tačka a) i 59b. st. (3) i (4) Poslovnika VSTV-a BiH stekla uvjete za predlaganje i imenovanje na poziciju sudije općinskog suda, Vijeće je vodilo računa o okolnostima koje su relevantne za procjenu podobnosti kandidatkinje iz člana 48a. ovog poslovnika, kao i o potrebi osiguranja adekvatne nacionalne i spolne zastupljenosti u navedenom sudu, u smislu člana 43. stav (2) Zakona o VSTV-u BiH.

Vijeće je prilikom imenovanja navedene kandidatkinje ocijenilo da ne postoje okolnosti koje izazivaju sumnju u pogledu podobnosti kandidatkinje za poziciju za koju se prijavila.

Adekvatna nacionalna zastupljenost u konkretnom sudu utvrđena je na osnovu popisa stanovništva iz 1991. godine i zaključka Vijeća koji je javno objavljen na internet stranici Vijeća, donesenom na sjednici Vijeća održanoj 9.3.2017. godine koji glasi:

„Vijeće je usvojilo zaključak da će se, za svrhu budućih imenovanja, prilikom utvrđivanja nacionalnog balansa u općinskim i osnovnim sudovima u FBiH i RS-u za osnov uzimati podaci prema popisu stanovništva iz 1991. godine za područje općina koje ulaze u mjesnu nadležnost pojedinog suda. Ako su općine koje ulaze u mjesnu nadležnost pojedinog suda promijenile svoje granice u odnosu na stanje iz 1991. godine, u obzir će se uzimati podaci o nacionalnoj strukturi na nivou kantona/okruga.“

Nacionalna struktura 47 sudija, prema popisu stanovništva iz 1991. godine, bi trebala biti: Bošnjaci (23,8), Hrvati (7,1), Srbi (6,6) i Ostali (9,4). Trenutna nacionalna struktura 35 sudija: Bošnjaci (22), Hrvati (5), Srbi (5) i Ostali (3).

Prema prethodno navedenoj nacionalnoj strukturi u Općinskom sudu u Tuzli nedostaje kandidata iz reda bošnjačkog naroda (- 1,8), hrvatskog naroda (- 2,1), srpskog naroda (- 1,6) i ostalih (- 6,4).

Dakle, imajući u vidu trenutnu nacionalnu strukturu u Općinskom sudu u Tuzli, Vijeće je u konkretnom slučaju na jednu od deset oglašanih pozicija sudije navedenog suda imenovalo prvorangiranu kandidatkinju, koja dolazi iz reda bošnjačkog naroda. Na rang listi kandidata, shodno članu 59b. stav (3) Poslovnika VSTV-a BiH između kojih se vršio izbor i imenovanje, nije bilo kandidata iz reda ostalih.

Za navedenu kandidatkinju Vijeće smatra da će uspješno nastaviti obavljati dužnost sudije imajući u vidu njeno dosadašnje bogato i korisno iskustvo rada u pravosuđu u svojstvu dodatnog sudije Općinskog suda u Tuzli.

Imajući u vidu sve navedeno, Vijeće je primjenom kriterija iz člana 43. st. (1) i (2) Zakona o VSTV-u BiH, a u vezi sa okolnostima iz člana 59b. stav (5) i člana 61. Poslovnika VSTV-a BiH ocijenilo da je navedena kandidatkinja u potpunosti ispunila zakonom propisane uslove, kao i druge kriterije koji se cijene prilikom izbora kandidata, kako bi bila imenovana na poziciju sudije Općinskog suda u Tuzli.

Shodno odredbama člana 44. stav (6) Zakona o VSTV-u BiH, u slučaju pokretanja upravnog spora za ovu poziciju se odgađa stupanje na funkciju novoimenovanog sudije, dok se ne okonča sudski postupak.

U skladu sa odredbama člana 2. Zakona o izmjeni Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 50/24) sva lica imenovana u periodu od 23. marta 2024. do 28. februara 2025. mogu stupiti na funkciju, a provjera njihovih izvještaja o imovini i interesima će se obaviti nakon uspostavljanja Odjela za sprovođenje postupka po izvještajima. Ako ishod provjere bude negativan, pokrenuće se disciplinski postupak u skladu sa pravilima iz člana 86d. st. (3), (4) i (5).

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Pouka o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-3496-1/2024
Datum: 26.09.2024. godine



